

Zanpantzarren inauteria

Herriko atarian ongi etorria eginen diete bihar eguerdian Iturengo joaldunek Zubietakoei

Mozorro egunak Iturenen ere. Inauterien xarma nagusi da herriko kaleetan barrena eta zanpantzarren hotsa hurbil entzun daiteke jada. Joareak bizkarrean lotu eta kalera aterako dira bihar joaldunak. Ez dira, gainera, bakarrik egongo iturendarrak, urtero bezala Aurtitz auzoko eta Zubietako zanpantzarrekin batera zeharkatuko baitituzte herriko txokoak. Asteartean, alderantziz, Iturengoak joanen dira Zubietara.

Eduñe Elizondo / Iruñea

ZUBIETAKOEKIN batera, Nafarroako inauteri ezagun eta ospetsuenetakoa dira Iturengoak. Joan den ostegunean hasi ziren herriko gazteak aurtengo mozo-
ro egunak prestatzen. Urtero bezala, aretxe handia erosi eta hil egin zuten, haren puskekin bazkari eta afari ederrak egiteko inauterietan. Herriko etxe eta baserrietan ere egon ziren ostiralean eta baita atzo ere, bakoi-tzak eman nahi zuena esker onez hartzeko. Gau partean, Herriko Etxeko ganbaran bildu ziren gazte guztiak —baita hain gazte ez zirenak ere— egunean zehar jasotakoarekin afari ederra egiteko. Udaletxeko ganbara, hain zuzen, herritarren eguneroko bilgune bihurtzen da egun haue-tan. Eta afaldu ondoren, dant-zaldia.

Gaur, berriz, gosaria eginen dute Iturenen eguerdiko ordu bata aldera, Udaletxeko ganba-ran. Eta ondoren, ordu bata eta erdietan, aizkora apustu interes-

garria ikusi eta gozatzeko aukera izanen dute herritarrek. Kristina Saralegi leitzarria Iturengo Maika Ariztegiren aurka ariko da. Zortzi enbor moztu beharko dituzte. Apustua Iturengo plazan eginen dute. Bazkalorduan Herriko Etxeko ganbara izanen da berriz ere herritarren biltoki, eta ondo-ren, dantzaldia izanen da herriko

plazan, afalorduan atzera uda-
letxera itzuli arte.

Baina zalantzarik gabe, bihar-
koa izanen da inauterietako egu-
nik handiena eta, noski, herriko
eta Zubietako joaldunak izanen
dira protagonista. Iturengo zan-
pantzarrek eguerdiko ordu bata
aldera aterako dira kalera, eta
herrian zehar joareak jo ondotik,
Iturengo sarrerara hurbilduko
dira bertan Zubietako eta baita
Aurtitz Iturengo auzoko zan-
pantzarrei ongi etorria emateko.
Guztiak batera Iturengo kaleetan
barrena ibiliko dira, plazara ai-
legatu arte. Zanpantzarren atze-
tik, karrozak izanen dira. Herriko
plazan salda beroa hartuko dute
guztiak.

Iturengoak Zubietara

asteartean • Astelehenean Itu-
renen gertatutakoa, Zubietan
errepikatuko da asteartean. Hau
da, Iturengo eta Aurtitz auzoko
zanpantzarrek Zubietara abia-
tuko dira eguerdi partean eta
bertan, herrian sartu baino le-
hen, ongi etorria emanen dizkiete
Zubietako joaldunek. Zubietako
plazan, berriro ere, salda beroa
eta arrautzak janen dituzte bi
herrietako zanpantzarrek eta
baita bertara hurbildutako guz-
tiek ere.

Asteazkenean jai izanen dute
bi herrietako zanpantzarrek bai-
na Iturengo inauteriak ezagutu
nahi dituenak izanen du oraindik
zer ikusi. Herriko kaleetan zehar,

hain zuzen, kalejira eginen dute
herritarrek eskean, dirua biltze-
ko asmoz. Asteazkenekoaren
ondoren, atsedena hartuko
dute ostegun eta ostiralean, eta
larunbatean, berriz, herriko talde
ezberdinek herritar guztiak gon-
bidatuko dituzte bazkaltzera.
Joan den ostegunean hildako
aretxea bukatzen saiatuko dira
egun honetan. Baina bazkaldu
ezezik, beste egitekorik ere iza-
nen dute udaletxeko ganbaran
bildutakoak, kontuak egiteko
eguna baita larunbata. Izan ere,
Iturengo inauteriak herritar guz-
tiek ordaintzen dituzte etxeko
azken egunotan eskean ibilitako
gazteek bildutako dirutzaren bi-
dez. X



Joareak bizkarrean lotu eta kalera irtengo dira bihar joaldunak.

ANDER GILLENEA

ETXANDI TXOKO
Jatetxea


Ongi pasa Inauteak !!

☎ 45 04 91 • ITUREN



**Inauteriak heldu dira ta
gonbita behar igorri
hemengo berri ez dakizuten
hainbat Euskaldun jatorri
Inauteriak umore ona
bai dute beren jatorri.
Alaitasuna maite duena
Iturenera etorri.**

**AVRTIZKO
OSTATVA**



**ONGI
PASA
INAUTERIAK!**

☎ 45 04 77